

**TPM selar pembangkang
Utusan Online
10 Mac, 2012
Oleh AINOL AMRIZ ISMAIL dan SAIFULIZAM MOHAMAD**

KUALA PILAH 9 Mac - Timbalan Perdana Menteri, Tan Sri Muhyiddin Yassin menyelar pembangkang yang mendakwa keputusan memansuhkan skim Saraan Baru Perkhidmatan Awam (SBPA) dan digantikan dengan penambahbaikan Sistem Saraan Malaysia (SSM) sebagai kegagalan kerajaan.

Sebaliknya, beliau menegaskan bahawa langkah tersebut menjadi bukti bahawa kerajaan begitu responsif terhadap maklum balas daripada penjawat awam di negara ini.

Beliau turut menyifatkan dakwaan pihak pembangkang itu sebagai petunjuk bahawa mereka sememangnya gentar dengan perkembangan tersebut kerana pengumuman yang dibuat oleh Perdana Menteri, Datuk Seri Najib Tun Razak diterima baik oleh kakitangan dan pegawai kerajaan.

"Ia bukan kegagalan. Apabila kita mahu mengemukakan SBPA, rupa-rupanya ada perkara tertentu yang kita tidak tahu di peringkat awal. Setelah ia diperincikan satu persatu, pihak Kongres Kesatuan Pekerja-Pekerja Di Dalam Perkhidmatan Awam (CUEPACS) yang mewakili kakitangan awam telah memberi pandangan.

"Antara pandangan mereka, sistem (SBPA) tidak dapat memenuhi tuntutan mereka, antaranya kenaikan gaji dan kemudahan yang lain. Akhirnya kita menerima pandangan ini dan kita respons terhadap cadangan mereka melalui pengumuman Perdana Menteri semalam," katanya.

Muhyiddin berkata demikian pada Majlis Perjumpaan Dengan Guru Agama, Guru Takmir, Ahli Jawatankuasa (AJK) Masjid, Guru Kelas al-Quran dan Fardu Ain (KAFA) dan Pemimpin Masyarakat di Sekolah Menengah Rendah Agama (SMRA) Johol dekat sini hari ini.

Hadir sama Menteri Besar, Datuk Seri Mohamad Hasan dan pemimpin peringkat negeri.

Timbalan Perdana Menteri juga menegaskan, SPBA tidak lagi dilaksanakan, justeru bagaimana ia boleh dikatakan gagal.

Dalam perkembangan lain, beliau yang juga Menteri Pelajaran berkata, sesi dialog terbuka untuk mengkaji sistem pendidikan negara akan melibatkan pelbagai lapisan serta latar belakang masyarakat bagi memastikan kajian semula berkenaan mengambil kira pandangan semua pihak.

"Dialog ini akan mencakupi semua aspek pendidikan bermula daripada prasekolah, sekolah rendah, sekolah menengah, prauniversiti dan akhirnya universiti," katanya lagi.

Sebelum menamatkan lawatan ke Johol, Muhyiddin sempat menyerahkan cek RM30,000 kepada Rumah Kasih, Kampung Ulu Inas dan menunaikan solat Jumaat di Masjid Ulu Inas, Johol.

Pada sebelah petangnya, beliau mengadakan perbincangan tertutup dengan Mohamad di Hotel Royale Bintang, Seremban serta bertemu dengan kepimpinan BN di Hotel Klana Resort, Seremban dan berlepas pulang ke ibu negara lewat petang ini.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0310&pub=Utusan_Malaysia&sec=Dalam_Negeri&pg=dn_04.htm